

20
21

ISLA ((•)) ONLINE

Diamars 7 December 2021

Email: IslaOnline@gobierno.aw Tel: 528-4952

NOTICIA DI GOBIERNO

20
21

Gabinete Wever - Croes II





CONSEHO DI MINISTER UN BIAHA MAS NA SAN NICOLAS

Varios proyecto interesante pa desaroyo di San Nicolas a keda presenta



Diaranson 7 di december, e Prome Consejo di Minister pa Gabinete Wever-Croes II a tuma luga na Nicolaas Store na San Nicolas. Esaki ya caba tawata un tradicion cu Gobierno a cuminsa cu ne durante di Gabinete Wever-Croes I pa reuni na San Nicolas riba temanan di San Nicolas. E intencion ta pa Gabinete Wever-Croes II sigui cu e tradicion aki den e periodo di gobernacion nos dilanti. Tur Minister tawata presente hunto cu San Nicolas Business Asociacion (SNBA) na unda cu varios inversionista interesa den e desaroyo pa San Nicolas a duna presentacionnan hopi interesante di proyectonan grandi, mediano y chikito cu sigur lo trece desaroyo hopi importante pa Aruba y pa San Nicolas principalmente. Entre otro tawata tin proyecto di hotel, agricultura, social, y procesamiento di cuminda.

Den un presentacion hopi interesante, señor Aldrich Croes a splica riba un proyecto turistico cu Gobierno kier bin cu ne riba e tema di Segundo Guerra Mundial.

Señor Greg Marval y señor Greg Ras a presenta un proyecto social y di agricultura cu yama Green House.

Señor Alberto Perret y señor Jaime Gomez a presenta un

proyecto di un hotel na San Nicolas.

Chef Darwing a presenta un proyecto hopi interesante riba procesamiento di cuminda.

Señor Marcelino Quandt cu ta doño di hotel Marchena den caya grandi, a duna un presentacion riba e proyecto di Marchong NV Boutique Hotel & Casino.

E session di Consejo di Minister a cera cu reunion cu San Nicolas Business Association (SNBA).

Prome Minister Evelyn Wever-Croes a duna di conoce cu lo haci follow up riba e proyectonan aki, di cua ya algun a cuminsa caba.

“Tin potencial especialmente awo cu Hotel Secrets ta bayendo den fase di construccion. Hendenan por mira cu tin movecion di desaroyo den San Nicolas. Tambe ta bin desaroyo sostenibel cu ta respeta nos medio ambiente na Sero Colorado den e area di Baby Beach. San Nicolas lo bira e punto di atencion pa desaroyo na Aruba den e siguiente añanan. Esaki ta yena mi cu un alegria inmenso”, Prome Minister Evelyn Wever-Croes a duna di conoce.

Continuacion **CONSEJO DI MINISTER UN BIAHA MAS NA SAN NICOLAS....**



MUCHANAN A BISHITA BESTUURSKANTOOR PA RICIBI NAN PREMIO DI PARTICIPACION NA E CONCURSO DI KLEUR "STIMA BO MASCOTA" 2021



Manera ya caba a wordo anuncia, mas di 100 mucha a participa na e concurso di kleur "Stima Bo Mascota" 2021. E concurso tabatin e meta pa sigui conscientisa, specialmente nos muchanan, cu nan mascota merece bon cuida, y cu ta masha normal pa laga sterilisa bo mascota. Dialuna 6 di december, 7 mucha ganador a bay Bestuurskantoor pa nan ricibi nan premio.

Compra/Purina cu a haci e concurso aki posibel, tabatin un basket grandi pa tur 7 mucha, y mas den siman nan por pasa Compra buska un regalito pa nan mascota tambe.

Ademas di representantenan di Compra, Armando Goedgedrag cu a diseña e imagen cu e muchanan a kleur, Prome Minister Evelyn Wever-Croes, Minister di Naturalesa y Bienestar di Animalnan en general, Ursell Arends y Minister di Enseñansa Endy Croes tabata presente y e ministernan tambe tabatin un regalito pa e muchanan.

E top 3 di e scolnan participante, esta Agnes Kleuterschool (54%), Imelda Kleuterschool (18%), y Ayo Kleuterschool (15%) a ricibi un reconocemento pa e gran participacion na e concurso



educativo aki cu ta na bienestar di nos mascotanan.

Dia internacional di mucha, diasabra dia 20 di november, e ganadonan a wordo anuncia riba e pagina di FaceBook Stima Mi Mascota. Ta trata di Levi Kelly y Cristofer Mestizo di 4 aña, Sofia Buunen y Nivlaine Laclé di 5 aña, y Kailong Lie Kwie, Candice Reyes y Amy Koolman di 6 aña. Masha pabien muchanan!

Continuacion MUCHANAN A BISHITA BESTUURSKANTOOR....





Minister Xiomara Maduro:

PAIS ARUBA TA SINTI SU MES INCOMODO ORA CU AVP A HACI Y DESHACI CU PUEBLO

**Bo mester tin hopi curason bisa algo y bo actonan ta
mustra lo contrario**



Durante tratamento di e Ley di garantia di deposito den Parlamento di Aruba, Minister Xiomara Maduro a remarca cu Pueblo ta sinti incomodo ta danki na AVP su falta di responsabilidad.

Esaki ta basa riba locual e Fraccion di AVP a trece dilanti den parlamento cu Minister ta laga nan sinti nan mes incomodo. Minister Maduro a reacciona riba e fraccion di AVP treciendo dilanti cu Pais Aruba ta sinti su mes incomodo, pasobra sigur ora cu AVP a haci y deshaci y tabata grita cu ta nan ta manda, pasobra ta nan tin mayoria den parlamento y bulldoze ley sin worry cu nada.

Awe Sr. Eman ta papia di aansprakelijkheid pero Sr. Eman no a worry cu aansprakeñijkheid ora cu a yena nos pais cu proyectonan PPP cu pais Aruba tin cu paga te aña 2040. No

a worry cu den e contract di PPP tabata tin poni cu si e dos companianan di rating degrada nos pais, e contract ta bira cu di biaha nan lo por cobra. Minister Maduro a remarca cu Standard & Poors a wanta nos y Fitch a laga nos cay y si no tabata pa Standard & Poors, Pais Aruba lo tabata den mas problema. Den e bida aki mas cu nos tino nos mester usa nos curason, cual e gobierno di AVP, ni e fraccion no a haci.

Bo mester tin hopi curason pa bo bin den Parlamento y bisa algo y bo actonan ta lo contrario, manera un baranca bo a pone bo pueblo sinti incomodo Minister Xiomara Maduro a trece dilanti durante e reunion den parlamento. E pueblo eyfor ta sinti hopi incomodo pa e situacion cu nos ta aden pa locual e mayoria den e sala aki lidera pa e ex minister presidente cu ta sinta awe den parlamento a pone pais Aruba pasa aden.

Departamento di Cultura: JOSSY TA UN GRAN BALUARTE CULTURAL PA NOS PAIS, TANTO LOCAL COMO INTERNACIONAL



Jossy Adriaan Brokke Jr. , cantante, compositor, canta autor, bos di oro, musico y gran baluarte cultural ta e prome persona cu a ricibi e 'Premio Nacional Crioyo di Oro' riba diaranson 1 di december 2021 den Cas di Cultura. Tabata un anochi espectacular!

Un premio bon mereci y El a ricibi esaki durante di su Concierto 'T'ami ta Jossy', como celebracion y homenahe na e Bos di Oro di Aruba pa su 65 aña den farandula.

El a expresa:

"Palabra ta keda mi corto pa expresa tur e gratitud y emocion cu mi ta sinti.

Danki Go Cultura Foundation, Edjean Semeleer, Arthur Loefstok, nos titular di Cultura Sra. Xiomara Maduro y tur esnan cu a percura pa un anochi fantastico y inolvidable."

Departamento di Cultura Aruba a aporta na e bunita proyecto aki cu ta iniciativa di Go Cultura Foundation na un gran baluarte cultural y yiu di tera. Y ta aplaudi esaki.

Director, staf y personal ta felicita Go Cultura Foundation y e galardonado Jossy Brokke Jr. cu su premio, aniversario y Concierto.

Pabien Jossy Brokke Jr.



Minister Xiomara Maduro ta informa: DEN AÑA 2020 TUR COMPANIA ESTATAL A CUMPLI CU E CONDICION DI HULANDA PA UN RECORTE DI 12,6 % DEN SALARIO Y BENEFICIO NA INTERES GENERAL DI ARUBA

Pa aña 2021 lo sigui investigacion di accountant pa controla si a cumpli cu e condicion di recorte

Un di e condicionnan pa Aruba por haya sosten di likides den forma di prestamo di Hulanda, ta pa companianan estatal tambe ta solidario na interes general y haci un recorte den salario y beneficio na analogia di e recorte di 12,6% den sector publico. E recorte pa companianan estatal a tuma lugar den salario y beneficio di e directornan, trahadornan y hunta di supervision, di respectivamente 20%, 12,6% y 20%.

CONTROL DI ACCOUNTANT

Pa controla cu e recorte aki a tuma lugar, Minister di Finansa a pidi cada compania estatal pa duna un bista di e recorte aplica y raporta esaki apart den nan cuenta anual. Como cu hopi compania tin un retraso den trahamento y/of control di nan cuenta anual pa aña 2020, Minister di Finansa a yega na e palabracion cu e Asociacion di Accountant di Aruba cu un accountant lo traha un raportahe apart, un 'Agreed-Upon Procedures,' cu ta duna un bista si e compania a cumpli of no cu e recorte di 12,6%. E raportahe aki a wordo traha y riba 30 di augustus 2021, 22 compania estatal a raporta na Minister di Finansa riba e recorte. Di e 22 companianan estatal, ta na Serlimar so no a tuma lugar ainda e investigacion door di un accountant, debi cu Serlimar door di su situacion financiero precario y e estado di 'surseance di betaling' no por permiti su mes e extra gasto pa un accountant haci e raportahe necesario.

CONTRIBUCION NA FONDO DI FASE

Banda di demostra solidaridad y pa por cumpli cu e condicion pa haya sosten di likides di Hulanda na interes general di Aruba, Gobierno a pidi e companianan estatal pa pasa e fondonan acumula di e recorte pa un cuenta apart di Gobierno na Banco Central pa asina cubri gastonan di FASE. E investigacion di accountant tambe a raporta riba e contribucion aki. Di e 22 companianan estatal, 8 compania a stort e fondo di recorte den e cuenta special di FASE. E otro 14 companianan cu no a manda e recorte, mester a presenta un 'liquiditeitsoverzicht' di aña 2020 den cual mester comproba cu nan tabata financieramente mal para y na bienestar di e compania no por a cumpli na manda e recorte pa e fondo special di FASE. Esnan cu por y no a cumpli, lo wordo exigi pa cumpli.

CONSEHONAN CAFT

Dia 24 di november CAFT a pidi Gobierno pa recorda e companianan estatal pa nan manda e placa di e recorte pa caha di Gobierno. Mas reciente, dia 29 di november CAFT ta pidi pa mantene e recorte den sector (semi) publico te ora cu

Conseho di Minister di Reino dicidi otro.

RECORTE DEN AÑA 2021

Informacion riba e recorte den companianan estatal den aña 2021, lo sigui asina cu e cuentanan anual ta cla of asina cu e informacion necesario di e companianan estatal ta disponibel pa e investigacion di accountant por tuma lugar.



BISTA RIBA Finansa Publico
RECORTE COMPANIANAN ESTATAL

CONTROL DI ACCOUNTANT
'Agreed-Upon Procedures,' cu ta duna un bista si e compania a cumpli of no cu e recorte di 12,6%.

Den 2020 tur 22 compania a cortá den salario y beneficio

- Tin 8 compania cu a deposita den fondo FASE
- E otro 14 compania mester presenta un 'liquiditeitsoverzicht' cu ta mustra cu den aña 2020 nan tabata tin problema financiero. Esnan cu por y no a cumpli lo wordo exigi pa cumpli.

Pa aña 2021 lo sigui investigacion di accountant pa controla si a cumpli cu e condicion di recorte.





BISTA RIBA Finansa Publico
RECORTE COMPANIANAN ESTATAL

CONSEHO CAFT

- 3. De gelleerde overheidsentiteiten dringend te rappelleren om de afdrachten van de 12,6 procent korting op arbeidsvoorwaarden over te maken aan het land.
- Houdt de korting op arbeidsvoorwaarden van medewerkers in de (semi)publieke en van de geassocieerde instellingen in stand totdat hierover anders door de RMR is besloten.

Dia 24 november CAFT ta pidi pa recorda e companianan estatal pa nan manda e placa di recorte pa Gobierno.

Dia 29 november CAFT ta pidi pa mantene e recorte den sector (semi) publico te ora cu Conseho di Minister di Reino dicidi otro.



BISTA RIBA Finansa Publico
RECORTE COMPANIANAN ESTATAL

Condicion pa Aruba por haya sosten di likidez den forma di prestamo di Hulanda

Solidario na interes general	Recorte den salario y beneficio
Recorte den salario y beneficio na analogia di e recorte di 12,6% den sector publico.	Directornan 20% Trahadornan 12,6% Hunta di supervision 20%



Conseho di Minister a reuni na San Nicolas

MINISTER ODUBER TIN VARIOS PROYECTO CU A EHECUTA Y CU LO EHECUTA E PERIODO AKI



Diamars mainta Conseho di Minister a reuni na San Nicolas Store caminda e ministerraad a tuma lugar hunto cu varios inversionista presente. Pa Minister di Turismo y Salud Publico Sr. Danguí Oduber esaki ta hopi importante den cuadro cu e masterplan cu tin pa San Nicolas. E mandatario a haci hopi proyecto pa San Nicolas den su prome termino como

minister y kier continua cu su bon trabou den e gobernacion di 2021-2025.

Durante gobernacion di Gabinete Wever-Croes 1 Minister Oduber a ehecuta varios proyecto den cuadro di e vision y masterplan pa San Nicolas. Den esaki a inclui e proyecto di Baby Beach fase 1 y 2 (fase 1 ya caba a wordo entrega), a inclui e renobacion di e Oficina di Turismo na San Nicolas. A introduci e festival cultural di Island Fest cu lamentablemente mester a para temporalmente door di e pandemia. A renoba e pier na Rodgers Beach y dentro di poco e proyecto di renobacion di e trapi na Rodgers Beach tambe lo cuminsa. Mescos cu a sosode na e proyecto di Baby Beach tambe ta planea pa pasa na Rodgers Beach.


Minister Oduber a sigui bisa cu Gobierno ta kere cu San Nicolas tin e potencial pa bira un segundo capital turistico di Aruba. Pesey Minister Oduber lo bay sigui inverti tambe den e oficina di Turismo di San Nicolas. Minister Oduber su vision y maneho pa e siguiente 4 añanan di gobernacion, lo bay enfoca mucho mas riba e turismo niche. Esaki nan ta e turistanan di "low volume high impact", e turistanan cu tin un entrada anual di mas di 150 mil dollar pa aña.

Minister Oduber a zorg tambe pa haci e inversion necesario



na ImSan pa por a finalisa e proyecto di radioterapia y tambe percura pa ImSan haya 22 cama cu por wordo usa pa shortstay hospital. Un inversion di mas di 60 miyon florin. Minister Oduber ta enfoca hopi tambe pa den e periodo di gobernacion aki cristaliza e JCI accreditation pa ImSan. Na momento cu esaki keda cla ImSan por sigui crece y na mes momento ta habri porta tambe pa turismo medico.

Minister Danguí Oduber a enfatisa cu Aruba ta conoci como un destinacion di calidad y pa mantene e expectativa aki mester keda haci inversionnan pa atrae mas inversionistanan. Turismo ta keda e driver principal di nos economia.



Minister Geoffrey Wever durante bishita na Aruba Aloë: STIMULA PRODUCCION LOCAL Y EXPORTACION TA UN PRIORIDAD



Recientemente Minister di Asuntonan Economico, Comunicacion y Desaroyo Sostenibel, Geoffrey Wever a haci un bishita na Aruba Aloë Balm N.V. Durante un recorrido di e plantacion y tambe e fabrica, Minister Wever a haya un splicacion amplio di gerente di Aruba Aloë Balm N.V. di e historia di e empresa, e manera con e empresa a crece y ta sigui crece. Tambe a duna un splicacion di e proceso di produccion. Minister Wever a keda impresiona cu e nivel di profesionalismo y calidad cu e compania ta desplega, y asina tambe con nan ta exporta un cantidad grandi di producto nan "Made in Aruba".

Na 2020 Aruba Aloe Balm N.V. a cumpli 100 aña di existencia y a traves di decreto royal a haya e honor pa hiba e nomber "Royal Aruba Aloe", haciendo e empresa local aki, e promer den Caribe Hulandes pa hiba e titulo aki.

"Ta bunita pa mira un empresa local, cu un historia comercial Arubiano unico", segun Minister Wever. Mirando cu ta trata di empresarionan local, cuminsando cu famia Eman na 1890, cu

a haci Aruba un di e exportadornan di Aloë mas importante na mundo y awe ainda ta existi y ta innovando nan produccion continuamente y tin presencia internacionalmente. Aloë ta parti di e historia comercial di Aruba y den pasado a forma un fuente di entrada significativo pa hopi famia Arubiano y pa e motibo ey tambe ta forma parti di escudo di nos pais.

E bishita di Minister Wever na Royal Aruba Aloë ta forma parti di varios bishita na productornan y exportadornan local den e cuadro di stimula produccion y exportacion local. Mirando nos dependencia riba importacion, Minister Wever kier stimula mas produccion local, tanto pa e mercado local, pero tambe pa exportacion, asina tambe por reduci e dependencia riba produccion di afo. Ta pa e motibo aki ta importante pa compronde con nos como gobierno por asisti empresanan cu legislacion y un maneho cu ta facilita y stimula mas produccion local y exportacion, haciendo e bishitanan aki hopi importante.

Minister Wever a keda satisfecho y kier gradici Royal Aruba Aloë pa e experiencia y experticio comparti.



A BISHITA STICHTING RECLASSERING & JEUGD BESCHERMING (SRJB) Y A RICIBI PRESENTACION DI PROYECTONAN PA PRESUPUESTO 2022

Recientemente, Minister di Husticia y Asuntonan Social Sr. Rocco Tjon, tawata di bishita serca Stichting Reclassering en Jeugdbescherming (SRJB), caminda a sera conoci cu e ekipo di maneho como tambe e directora di SRJB esta Sra. Seraida Pemberton – Leonard. Durante e bishita aki Minister Tjon a ricibi un presentacion amplio di proyectonan cu ta cay bou di SRJB. A elabora tambe riba algun di e proyectonan aki pa asina brinda un miho tratamento y guia di hobennan cu ta cay den man di Husticia.

Segun Minister Tjon, a trata di un reunion sumamente informativo y interesante tambe mirando e trabou cu SRJB ta haci. SRJB tin un tarea hopi importante pa loke ta amplia e bienestar y seguridad en general, y ta haci esaki a traves di procesonan di resocialisacion y reintegracion. Tambe a papia riba diferente proyectonan cu SRJB lo kier rebiba bek, e aña binidero cual ta cuadra bon cu e “beleidsvoornemens” tambe di Ministerio di Husticia y Asuntonan Social.

Den cuadro di esaki, a papia di algun proyecto principal manera Kamer Begeleid Wonen (KBW) y Elektronische Toezicht (Enkelband). Kamer Begeleid Wonen (KBW), ta un proyecto cu ta ensera cu e hobennan cu a cay den man di husticia pero no a bay sera na KIA ta haya e oportunidad pa bay den e KBW. Akinan e hobennan ta haya un guia pa asina siñanan bira hobennan independiente. Ta yuda nan pa yega na un vivienda y ta yuda nan haya trabou. Siguiendo proyecto cu a papia di dje ta e Elektronische Toezicht (Enkelband), e proyecto aki ta necesario pa Aruba ya cu un persona cu haya un “voorwaardelijk invrijheidsstelling (VI)” por haya e esaki nan nan enkel y por sigui unda e persona ta bay y si e ta cumpli cu e acuerdonan segun ley.

E Mandatario a splica cu, proyectonan manera KBW, pero tambe Electronisch Toezicht ta proyectonan cu ta di balor agrega, y si mira e resultado di e balor agrega cu esaki ta



bay tin no solamente pa husticia en general pero muy en particularmente tambe den bida di e hobennan, esakinan ta proyectonan cu sigur por conta cu sosten di Ministerio di Husticia y Asuntonan Social. Actualmente lo ricibi for di SRJB e “projectdossier” pa asina wak con ta bay acapara esaki den presupuesto 2022. E sumanan cu ta necesario ta sumanan cu por wordo presupuesta a base di e “projectdossier” pa asina logra tuma e decision final. Ora mira e cifranan aki, caminda 75% di e hobennan cu pasa a traves di un proyecto manera KBW, ta hobennan cu no ta cay bek riba e mal caminda, pues e impacto cu e proyectonan aki tin den bida di e hobennan aki ta di balor agrega.

Por ultimo, Minister Tjon a elabora tambe riba e parti di Electronisch Toezicht, cual ta conceptonan cu den reino mes ta wordo usa, por ehempel na Hulanda, Boneiro y Curacao. E balor agrega di esaki ta diferente, den sentido cu e ta baha gastonan pa loke ta esnan sera na KIA como tambe eleva e seguridad pa esnan cu ta traha na KIA y e hoben mes. Lo mester defini si, naturalmente, e cuadro pa loke ta e maneho, dus ki tipo di delitonan ta bin na remarke pa por introduci Electronisch Toezicht, sinembargo e balor agrega ta consisti di diferente fasetanan.

CURSO EHBO/CPR PA TUR E CENTRONAN DI CUIDO DI MUCHA TABATA UN EXITO ROTUNDO



En conexhon cu e Ley di Centro di Cuido di Mucha cu pronto lo drenta na vigor, Departamento di Mucha y Hoben (DMH i.o.) conhuntamente cu Willy Williams y John Tromp di IMSAN a organisa 4 atardi/anoche di curso di EHBO/CPR pa tur cabesante y e trahadornan pedagogico di e Centronan di Cuido di Mucha.

Un di e exigencianan cardinal den futuro pa loke ta trata e Ley di Centro di Cuido di Mucha ta, cu mester tin minimo un persona, sea ta e trahador pedagogico of e cabesante na e Centro di Cuido di Mucha, cu ta presente na e Centro, ta dispone di conocimiento y e carnet di EHBO/CPR valido. Pero e preferencia responsabel ta pa tur cu ta traha cu mucha den un Centro di Cuido di Mucha, ta dispone di e habilidad aki.

P'esey mes mirando cu tin como 119 Centro di Cuido di Mucha na DMH registra y cada un tin nan trahadornan tambe, a opta pa acerca mr. Willy Williams di Centro di Bario Brazil. Di e forma aki por a organisa e curso pa un cantidad mas grandi y asina cubri mas Centro di Cuido di Mucha cu ta posibel. No ta algo usual ni structural cu DMH lo bay haci, pero mirando e enorme demanda como tambe e gran importancia di EHBO/CPR valido den centro di cuido di mucha, nos a dicidi brinda un sosten pa ehecuta esaki.

Tin di remarca cu a ricibi un bon acohida di parti e Centronan di Cuido di Mucha. Total a ricibi un cantidad di 165 persona cu a inscribi y e cantidad aki lo ta reparti den 4 grupo. Ta di aplaudi con dedica y serio e grupo aki ta tuma nan trabou y ta mira e importancia pa tin e carnet valido aki.

DMH kier a gradici tur e Centronan di Cuido di Mucha cu a asisti e curso aki y tambe Williams y Tromp y Centro di Bario Brazil



(pa e espacio) cu riba termino corto por a yuda nos organisa esaki. Tambe nos a compronde cu ainda tin algun Centro di Cuido di Mucha, cu ta interesa pa sera un grupo extra y nos kier a avisa cu asina cu aña habri, nos lo wak e posibilidadnan pa por haci esaki un realidad.

Nos kier a ecurasha esnan cu ainda tin interes y pa un of otro motibo no a logra participa na e 4 oportunidadnan cu a tuma lugar, please manda un email na dmharuba@gmail.com pa asina nos por tin un bista di e cantidad di persona den e area di Centro di Cuido di Mucha cu ainda tin interes/falta pa cumpli cu esaki.



MINISTER ENDY CROES A REUNI CU FEDERACION DI TRAHADORNAN DI ARUBA 'FTA' Y SHOP STUWARD DI FUNDACION FACILIDADNAN DEPORTIVO 'FFD'



Siman pasa Minister Endy Croes a ricibi bishita di sr. Hubert Dirksz di FTA y dos 'Shop Steward' di FFD. Durante e reunion informativo a pone Minister Endy Croes na altura cu nan ta den proceso pa evalua diferente contractnan cu FFD tin cu su empleadonan.

Algun di e empleadonan tin contract di ASU cu a bay over na FFD, otro tin contract di Lotto pa Deporte cu a bay over na FFD y tin empleado cu ta den dienst di FFD mes cu otro tipo

di contract. Nan a agrega cu banda di esaki nan kier traha pa yega na un 'collectieve arbeidsovereenkomst' 'CAO' y FTA a vocifera cu nan lo lidera e proyecto aki pa nan.

E mandatario a scucha nan cu hopi atencion alabes ta desea FTA hopi exito den e lunanan nos dilanti cu e negociacionnan cu FFD. Minister Endy Croes a priminti di mantene contacto cu FTA y 'Shop Steward'.

MINISTER ENDY CROES A ATENDE UN BON REUNION STICHTING VERSTANDELIJK GEHANDICAPTEN ARUBA 'S.V.G.A.



Diabierna ultimo Minister di Enseñansa y Deporte Endy Croes a continua cu reunionan riba tereno di enseñansa y tabatin su prome encuentro pa sera conoci y combersa cu e Directora General di S.V.G.A. sra. Els van Homelen, Cabesante di Scol Dununman, sra. Sharline Geerman, tesoreo sr. Rentje Schutter y miembro di directiva, sra. Yin May Wong.

E tabata un bon reunion unda diferente tema a bin pa dilanti unda cu S.V.G.A a vocifera nan inquietudnan y plannan pa futuro. S.V.G.A. tin hopi interes pa Minister Endy Croes sostene e proyecto di ampliacion di e scol pa asina por duna oportunidad di educacion n'e muchanan special ora nan yega edad di 16 aña pa por sigui scol te cu 20 aña. Un problematica cu a bin dilanti t'e wifi di e scol, Minister Endy Croes a keda di traha riba e punto aki pa purba na resolve mas pronto posibel. Un otro punto cu tambe a wordo treci pa dilanti ta werksters pa e scol.

E Mandatario a pidi S.V.G.A. pa pone e peticion den un carta oficial y haci calculacion di e gastonan pa realisa e proyecto. E Mandatario lo percura pa brinda sosten na tur loke ta trata enseñansa y sigur enseñansa special.

Minster Endy Croes a scucha cu atencion tur puntonan cu a keda treci dilanti y e prioridadnan pa cu e tereno di enseñansa. Minister Endy Croes su deseo y empeño ta pa soluciona problematicanan mas tanto posibel, crea espacio pa tranquilidad, paz y mehoracion den e tereno di Enseñansa.



Director di DVL, señor Leo de Cuba: AWOR CLIENTENAN DI DLV POR 'SWIPE' OF 'TAP' PA HACI PAGO



E siman aki Dienst Landmeetkunde en Vastgoedregistratie (DLV) a pone den uzo e posibilidad pa por paga a traves di POS machine. Pues por swipe of tap na momento di paga pa un servicio na e departamento. Di e forma aki DLV ta dal un paso padilanti den direccion di mehoracion di servicio na su clientenan.

Director di DVL, señor Leo de Cuba a splica cu ya pa basta tempo e departamento tabatin e deseo y e necesidad pa por brinda clientenan e posibilidad pa paga haciendo uzo di nan carchi di banco. E necesidad aki a bira mas na momento cu a

wordo confronta cu covid. Pa por a logra e posibilidad di pago via POS Machine, DLV mester a cana un trayecto di adaptacion den e departamento pa por a intriduci esaki. E adaptacionnan ta encera infraestructura di tecnologia di comunicacion y tambe e aplicacion cu ta uza pa administra e pagonan cu ta bay wordo haci a traves di e POS machine. Esaki a tuma un poco tempo pero awor por bisa cu a yega asina leu.

A pesar di contratiemponan cu a encontra, ta contento pa por bisa tur cliente cu bin haci uzo di servicio, cu nan por paga awo cu carchi. Pues no mester bin cu cash mas. Ta importante pa menciona cu e posibilidad pa paga cu cash ta keda te cu januari 2022 y despues di esaki lo pasa completamente pa pago a traves di carchi.

Pa termina Director di e departamento a gradici tur cu di un forma of otro a yuda den e proceso, tambe Minister pa duna e espacio necesario pa DLV yega asina leu y facilita cu CAD duna un bon apoyo y conseho pa yega na e punto aki. Tambe tur colega di DLV y banco RBC. Ta spera cu aworaki por a honra peticion di clientenan cu pa hopi tempo tabata desea esaki.

HUNTO Combatiendo COVID-19



Laba man bon
frecuentemente



Mantene minimo 1.5M
distancia tur momento



Uza tapa boca
paden di tur lugar



No duda.
Vacuna!

Pa bo mes. Pa bo famia. Pa bo pais.



Departamento di Salud Publico: UPDATE 7 DI DECEMBER 2021

Segun resumen di awe 11 persona a recupera y un total di 24 caso nobo di COVID-19 a keda registra di cual 3 ta no-residente. E cifranan aki ta representa un 'Positivity rate' bou di nos residentenan di 12%.

E cantidad di casonan activo di COVID-19 pa awe ta 188 y cantidad di fayecidonan relaciona cu COVID-19 ta 175. Datos ta ilustra casonan nobo di COVID cu un average semanal di

19 caso pa dia y un averahe di 'positivity rate' semanal di 12% pa dia.

Actualmente na Aruba tin 7 persona interna debi na COVID di cual den ICU tin 5 persona y riba piso general tin 2. Na Colombia tin actualmente 9 persona den ICU y 3 riba piso general.

7/12/2021	TOTAL	RESIDENTE	NO-RESIDENTE
Casonan Nobo	24	21	3
Activo	188	150	38
Recupera	16118	14544	1574
Positivo	16484	14868	1616
Morto	175	171	4
Vacuna	83827	-	-
Hospitalisa AUA	7	-	-
ICU	14	-	-
AUA COL	5 9		

HABITONAN PA KEDA
Saludabel
DEN TEMPO DI COVID-19 Y VACUNACION



Prepara alimento den famia

Involucra bo yiunan den e preparacion di cuminda. Cushina por ta un bunita oportunidad pa comparti y promove habitonan saludabel den famia. Siña bo yiunan e balor nutritivo di cada ingrediente. Mustra nan e manera mas saludabel pa cushina cada producto. Mas bo cushina na cas cuminda nutritivo, mas saludabel bo lo keda. Pa combati COVID-19 bo mester mantene bo salud y vacuna, ya cu ta comproba cu e vacuna tin un efectividad halto pa proteha bo y evita transmision. Ban uza tur e hermentnan cu nos tin pa caba cu e virus aki na nos isla!

Ami SI
ta vacuna!



Mantene 1.5M
minimo di distancia



Laba man
frecuentemente



Uza tapa boca
paden di tur lugar.

VACUNA!



Un Feliz Dia

ISLA ONLINE

NOTICIA DI GOBIERNO